



SURUHANJAYA PILIHAN RAYA MALAYSIA

KENYATAAN MEDIA

BIL. 26/2026

MENJELANG HARI MENGUNDI PILIHAN RAYA UMUM (PRU) DEWAN NEGERI JOHOR KE-16

1. Suruhanjaya Pilihan Raya Malaysia (SPR) telah menjalankan proses semakan peralatan mengundi seperti peti undi, dakwat pilihan raya, kertas undi, petak undi dan sebagainya bagi kegunaan Hari Mengundi dalam **Pilihan Raya Umum (PRU) Dewan Negeri Johor Ke-16** pada **9 dan 10 Julai 2026 (Khamis dan Jumaat)**. Proses semakan ini dilaksanakan untuk memastikan kesemua peralatan atau kelengkapan bagi Hari Mengundi pada **11 Julai 2026 (Sabtu)**, lengkap dan berada dalam keadaan baik. Peralatan-peralatan ini kemudiannya akan diagihkan kepada Ketua-Ketua Tempat Mengundi (KTM) bagi setiap Tempat Mengundi (Saluran).
2. Pada hari mengundi, seramai **43,036 orang** akan bertugas dan sebanyak **1,076 Pusat Mengundi** dibuka kepada **2,682,642 orang pengundi biasa** bagi melaksanakan tanggungjawab mereka.

MASA KELUAR MENGUNDI

3. Pengundi dinasihatkan untuk tidak keluar mengundi pada saat-saat akhir dan digalakkan supaya keluar mengundi mengikut **Masa**

Keluar Mengundi Yang Digalakkan seperti yang tercatat pada **aplikasi MySPR Semak**. Walau bagaimanapun, pengundi masih boleh keluar mengundi mengikut kelapangan masa dari **jam 8.00 pagi hingga 6.00 petang ATAU mengikut waktu Pusat Mengundi diwartakan**.

4. Pengundi juga diingatkan supaya membawa **kad pengenalan** bagi tujuan identifikasi oleh Kerani Pengundian Pertama (KP1) di saluran. Pengundi juga dinasihatkan untuk terlebih dahulu membuat semakan maklumat pengundian bagi membantu kelancaran proses pengundian pada Hari Mengundi.
5. Semakan maklumat pengundian bertujuan untuk mengetahui **maklumat pusat mengundi, saluran mengundi dan nombor bilangan** yang boleh dibuat melalui portal semakan di pautan **<https://mysprsemak.spr.gov.my>** atau hubungi **Hotline SPR** di talian **03-8892 7218** atau melalui **aplikasi MySPR Semak** atau di **kaunter semakan daftar pemilih di Pusat Mengundi**.
6. Pengundi diingatkan supaya **tidak menyerahkan kad pengenalan** mereka kepada **pihak lain selain daripada petugas pilihan raya**.
7. SPR sekali lagi ingin mengingatkan para **majikan** agar **membenarkan tempoh yang munasabah kepada pekerja** mereka layak sebagai pemilih berdaftar untuk keluar mengundi dalam PRU Dewan Negeri Johor Ke-16 pada **11 Julai 2025 (Sabtu)** sebagaimana diperuntukkan di bawah **Akta Kesalahan Pilihan Raya 1954**.

TAMAT TEMPOH RASMI BERKEMPEN

8. SPR sekali lagi mengingatkan semua pihak yang bertanding bahawa tempoh rasmi berkempen akan tamat pada jam **11.59 minit malam, 10 Julai 2025 (Jumaat)**.
9. Selepas tempoh itu berakhir, semua pihak hendaklah menghentikan sebarang bentuk aktiviti berkempen termasuk aktiviti merayu undi termasuklah di luar Pusat Mengundi dan juga melalui saluran media sosial seperti *Facebook, X (Twitter), Instagram, TikTok, Thread* dan lain-lain.
10. SPR turut mengingatkan bahawa semua parti atau calon bertanding adalah **dilarang untuk membuka, membina atau menyelenggara barung pada Hari Mengundi** kerana perkara tersebut merupakan satu kesalahan di bawah **Akta Kesalahan Pilihan Raya 1954**.

LARANGAN PENGGUNAAN TELEFON BIMBIT DI TEMPAT MENGUNDI (SALURAN)

11. SPR telah memaklumkan kepada semua pengundi bahawa **penggunaan telefon bimbit** di tempat mengundi (saluran) adalah **tidak dibenarkan**. Sebagai peringatan, notis atau poster larangan penggunaan telefon bimbit akan diletakkan di luar dan di dalam tempat mengundi.

12. SPR turut menetapkan bahawa pengundi yang membawa telefon bimbit ke tempat mengundi perlu meletakkan telefon bimbit di tempat yang telah disediakan setelah menerima kertas undi dan mengambilnya semula setelah selesai mengundi.
13. Pelaksanaan tatacara pengundian yang baharu ini boleh dirujuk menerusi poster **Tatacara 10 Langkah Pengundian** yang menjelaskan proses pengundian sepenuhnya. Pengundi juga diingatkan **agar sentiasa menjaga kerahsiaan undi** masing-masing.

MEMAKAI BAJU ATAU MEMBAWA *MATERIAL* BERSIMBOL PARTI ATAU BERUNSUR KEMPEN CALON

14. Semua pengundi, calon dan petugas yang ingin memasuki Pusat Mengundi pada Hari Mengundi **dilarang memakai baju / topi / pelitup separuh muka (facemask) atau membawa material yang mempunyai nama / lambang/ simbol / gambar parti atau calon yang bertanding atau apa-apa bahan kempen serta sebarang tagline atau slogan kempen yang menjurus atau membawa maksud sokongan atau cenderung kepada mana-mana fahaman politik**. Kegagalan pengundi mematuhi atau melanggar peruntukan yang ditetapkan boleh menyebabkan pengundi dilarang dari memasuki Pusat Mengundi oleh petugas pilihan raya.

15. SPR berharap semua pihak mematuhi undang-undang, peraturan dan etika pilihan raya bagi memastikan kelancaran proses pilihan raya serta tidak menggugat ketenteraman awam. Sebarang pelanggaran undang-undang yang berkaitan boleh dikenakan tindakan.
16. Pengisytiharan keputusan rasmi bagi semua Bahagian Pilihan Raya Negeri akan diumumkan selepas proses penjumlahan rasmi undi bagi semua Bahagian Pilihan Raya Negeri diselesaikan.

DATUK KHAIRUL SHAHRIL BIN IDRUS

Setiausaha

Suruhanjaya Pilihan Raya Malaysia

10 Julai 2026 / 24 Muharam 1448H